



Selasa, 13 April 2021

Ogen: Jeremia 52 : 1-11



Kedungen Si La Patuh



Biasana adi lit sada perintah si arus ilakoken, banci jadi lit ije si patuh ngelakokensa lit ka si la patuh. Sabab labo kerina bagi ukurta si jadi ras sinilakoken kalak sideban ibas kai sinisuruh kita ilakokenna. Bageme pe kai si terjadi man kalak si la patuh man perentah Dibata, tupung raja Sedekia erdosa kempak Tuhan, merawa Tuhan man bana janah iambekkenNa kalak Israel ras Juda iadep-adepenNa nari. Ilawan Sedekia ka raja Nebukadneser emaka ilawan Nebukadnesar Jerusalem. Ipajekkenna benteng ras kemah i kelewet kuta janah paksa sie jadi kelihen si mesangat seh maka lanai lit si man pangan jelma si enterem. Jadi kebiaren man bangsa Israel erkiteken ia ikepong Babilon, raja Sedekia pe iayaki kalak Babilon emaka bangsa Israel desken manuk lanai je indungna, kelihen pe jadi perbeben, kerina bangsa enda ikepong bangsa Babilon, rajana pe iayak-ayak emaka jadi me kebiaren si mesangat man bangsa enda. Kenca raja Sedekia itangkap kiam kerina tenterana nadingken ia. Kenca sedekia itangkap maka kerina anak sidilaki ibas negeri e ibunuh iadepen Raja Sedekia ras Ripla, janah kenca sie ipulditken mata Sedekia igariken dengen ibaba ia ku Babilon ipenjaraken ia ije seh ngasa matena.

Turi-turin enda eme kedungen kalak si la patuh. Dibata mereken lalap pasu pasu man kalak si patuh, tapi mereken hukuman man kalak si la patuh. Emaka melala pe tantangan si man alanken ibas doni enda marilah kita tetap patuh ndalanken perentah Tuhan ras ngelakoken si mehuli gelah banci kita atan ibas pasu-pasu Dibata janah e jadi sikerajangenta. Ula medu ibas erbahan si mehuli anemgia mawen kita itokohi kalak, iakapna kita erbahan pencitraan gelah idah kalak. Tentu pusuhta labo ieteh kalak, emaka ula ngadi tetap erbahan simehuli.